

## Općinsko vijeće

Na osnovu člana 38. Zakona o sportu ("Službene novine Kantona Sarajevo", broj 11/01) i člana 25. Statuta Općine Stari grad Sarajevo ("Službene novine Kantona Sarajevo", br. 10/98 i 17/99), Općinsko vijeće Stari grad Sarajevo, na sjednici održanoj 18. oktobra 2001. godine, donijelo je

### ODLUKU

#### O NAČINU OSTVARIVANJA JAVNOG INTERESA OPĆINE STARI GRAD SARAJEVO U OBLASTI SPORTA

##### Član 1.

Dosljedno programskim ciljevima Strategije razvoja sporta Općine Stari grad Sarajevo, kao i obavezama proisteklim iz Zakona o sportu, Općinsko vijeće Stari grad Sarajevo (u daljem tekstu: Općinsko vijeće) donosi ovu odluku s ciljem da se uredi način ostvarivanja javnog interesa Općine Stari grad Sarajevo (u daljem tekstu: Općina) u oblasti sporta.

##### Član 2.

Javni interes Općine u oblasti sporta je:

- izgradnja, obnova i održavanje sportskih objekata od značaja za Općinu;
- efikasnije korišćenje prostornih vrijednosti teritorije Općine, te njihove ekonomske valorizacije kroz sport i rekreaciju;
- organizovani sport za sve, posebno u funkciji zdravlja građana, te afirmacije društvenih vrijednosti i socijalizacije ponašanja mladih;
- razvojni sport sa opredjeljenjem na masovnost;
- sportski odgoj i obrazovanje u predškolskim ustanovama i osnovnim školama;
- evidencija za područje općine.

##### Član 3.

Općinsko vijeće može posebnim aktom utvrditi i druge aktivnosti kao javni interes Općine u oblasti sporta, uz obavezu osiguranja sredstava za njihovo ostvarivanje.

##### Član 4.

U cilju stvaranja uslova masovnog bavljenja sportom i rekreacijom Općina će konkretnim projektima operacionalizirati ciljeve definirane Strategijom razvoja sporta Općine, koji se odnose na izgradnju i obnovu sportskih i rekreacionih objekata.

Izrada i realizacija ovih projekata će uvažiti urbane potrebe svih građana Općine, kao i ekonomske, ambijentalne i kulturno-historijske specifičnosti Starog Grada, te obuhvatiti načine korišćenja i održavanja sportskih objekata od značaja za Općinu.

##### Član 5.

Općina će pratiti rad sportskih organizacija koje su u funkciji ostvarivanja javnog interesa Općine u oblasti sporta.

Komisija za sport Općinskog vijeća će kontinuirano pratiti, analizirati i procjenjivati kvalitetu rada sportskih organizacija, što će biti osnova za dobijanje prava korišćenja sportskih objekata od značaja za Općinu, kao i sportskih sala osnovnih škola sa područja općine.

##### Član 6.

Korišćenje sportskih sala osnovnih škola je isključivo u funkciji što mnogobrojnijeg uključivanja mladih u organizovani sport, na način koji neće ugroziti realizaciju redovnih obrazovnih programa.

##### Član 7.

Nadležno ministarstvo Vlade Kantona Sarajevo donosi Pravilnik o kategorizaciji i namjeni sportskih objekata od značaja za Općinu.

Općinska sluba nadležna za sport uspostavlja i vodi evidenciju sportskih objekata koji su od značaja za Općinu, a koji su određeni Pravilnikom iz prethodnog stava.

##### Član 8.

U vršenju prava raspolaganja sportskim objektima od značaja za Općinu, Općinsko vijeće može putem konkursa prenijeti pravo upravljanja i korišćenja tih objekata drugom pravnom ili fizičkom licu koje organizuje aktivnosti u sportu.

Pravo upravljanja i korišćenja sportskim objektima prenosi se ugovorom kojim se uređuju međusobna prava i obaveze, a naročito uslovi kojima se obezbjeđuje namjensko, potpuno i racionalno korišćenje, kao i čuvanje i održavanje sportskih objekata.

##### Član 9.

Namjena sportskih objekata od značaja za Općinu ne može se mijenjati, izuzev uz posebnu proceduru pred Općinskim vijećem, na način kako je uređeno Zakonom o sportu.

##### Član 10.

Realnim planiranjem budžetskih sredstava Općina će stvarati prostor za materijalno-tehničku i finansijsku podršku sportskim organizacijama, predškolskim ustanovama i osnovnim školama na realizaciji projekata koji su u funkciji ostvarivanja javnog interesa Općine u oblasti sporta.

Općina izdvaja budžetska sredstva za finansiranje javnog interesa u oblasti sporta u skladu sa godišnjim programom rada načelnika Općine i opredjeljenjima Općinskog vijeća.

Načelnik Općine donosi Pravilnik o kriterijima za finansiranje javnog interesa iz prethodnog stava.

##### Član 11.

Sportske organizacije koje svojim djelovanjem ostvaruju javni interes Općine u sportu, dostavljaju općinskoj službi nadležnoj za sport svoj program rada za narednu godinu najkasnije do 30. oktobra tekuće godine.

##### Član 12.

Sportske organizacije kojima je na osnovu programa rada odobreno korišćenje budžetskih sredstava Općine, dužne su općinskoj službi nadležnoj za sport dostaviti redovan godišnji izvještaj o radu i načinu utroška sredstava za prethodnu godinu najkasnije do 31. januara tekuće godine i isti će biti dostavljeni Općinskom vijeću pri odobravanju budžetskih sredstava za sljedeću godinu.

##### Član 13.

Sportske organizacije, koje koriste budžetska sredstva Općine, dužne su, na zahtjev načelnika Općine, dostaviti poseban izvještaj o radu u roku od 15 dana od njegovog traženja.

Ukoliko organizacija iz prethodnog stava ne dostavi izvještaj u navedenom roku načelnik Općine može obustaviti dalje finansiranje njenog programa.

##### Član 14.

Načelnik Općine će donijeti pravilnik o kriterijima za finansiranje javnog interesa Općine u sportu, u roku od 30 dana od dana stupanja na snagu ove odluke.

Član 15.

Ova odluka stupa na snagu osmog dana od dana objavljivanja u "Službenim novinama Kantona Sarajevo".

Broj 02-49-202/01  
18. oktobra 2001. godine  
Sarajevo

Predsjedavajući Općinskog  
vijeća Stari grad Sarajevo  
mr. **Ismet Ovcina**, s. r.

Na osnovu čl. 10. i 25. Statuta Općine Stari grad Sarajevo ("Službene novine Kantona Sarajevo", broj 10/98), člana 40. stav 3. čl. 49. i 56. Zakona o prostornom uređenju Kantona Sarajevo ("Službene novine Kantona Sarajevo", br. 13/99 i 19/99), Općinsko vijeće Stari grad Sarajevo, na sjednici održanoj 18. oktobra 2001. godine, donijelo je

**ODLUKU**

**O PRISTUPANJU IZRADI URBANISTIČKOG  
PROJEKTA "NEVJESTINA MAHALA"**

Član 1.

Pristupa se izradi Urbanističkog projekta "Nevjestina mahala" (u daljem tekstu: Plan).

Član 2.

Granica obuhvata Plana počinje od tromede parcele k.č. 3337, 3339 i 3342 (ulica Podbedomom), ide na jugoistok međama parcela k.č. 3339 i 3338 (obuhvata ih), presijeca put k.č. 3335 te putem k.č. 3354 produžava na jugozapad (obuhvata ga) i dolazi do njegovog raskršća sa putem k.č. 3388, ide na jugoistok u pravoj liniji i dolazi do tačke broj 1 koja se nalazi na parceli k.č. 3389 udaljenoj od jugoistočnog ishodišta lista R=1:1000 broj 150 po  $y = 221$  m, a po  $x = 276,5$  m, lomi se idući na jugozapad u blagom luku i dolazi do tačke broj 2 koja je udaljena od jugoistočnog ishodišta lista R = 1:1000 broj 150 po  $y = 266$  m, a po  $x = 260,5$  m, produžava na sjeveroistok idući u pravoj liniji do tačke broj 3 koja je udaljena od jugoistočnog ishodišta lista R = 1:1000 broj 150 po  $y = 254,5$  m a po  $x = 292,5$  m, nastavlja na sjeverozapad idući ulicom Nevjestina k.č. 2548 (obuhvata je), skreće na sjeveroistok idući međom između parcela k.č. 3557 sa lijeve i k.č. 3556 sa desne strane (obuhvata je) i izlazi na ulicu Podbedomom k.č. 3442 kojom nastavlja na jugoistok (obuhvata je) te dolazi do tromede odnosno mjesta odakle je opis granice prostornog obuhvata i počeo.

Sve naprijed navedene parcele nalaze se u K.O. Sarajevo II. Ukupna površina područja planiranja iznosi 1,69 ha.

Član 3.

Nosilac pripreme Plana je načelnik Općine Stari grad Sarajevo.

Nosilac izrade Plana je Zavod za planiranje razvoja Kantona Sarajevo.

Nosilac pripreme Plana će fazu izrade plana povjeriti pravnom licu registrovanom za tu vrstu djelatnosti, a na osnovu najpovoljnije ponude.

Član 4.

Sredstva za izradu Plana obezbjeđuje Općina Stari grad Sarajevo putem krajnjih investitora, a iznos potrebnih sredstava će se utvrditi nakon izbora najpovoljnije ponude za izradu Plana.

Član 5.

Rok za izradu Plana je 60 dana od dana donošenja ove odluke.

Član 6.

Izradi Plana prethodi:

- izrada smjernica za pripremanje i izradu Plana,
- izrada analitičko-dokumentacione osnove.

Nosilac pripreme Plana će verifikovati dokumente iz prethodnog stava.

Član 7.

Nosilac pripreme Plana će utvrditi nacrt Plana i podnijeti ga Općinskom vijeću na razmatranje i stavljanje na javni uvid i raspravu u trajanju od 15 dana.

Član 8.

Na osnovu rezultata javne rasprave i stava o nacrtu Plana Nosilac pripreme Plana utvrdit će prijedlog Plana i podnijeti ga Općinskom vijeću Općine Stari grad Sarajevo na donošenje.

Član 9.

Subjekti planiranja su: Kanton Sarajevo, Grad Sarajevo, Općina Stari grad Sarajevo, Zavod za izgradnju Kantona Sarajevo, Kantonalni zavod za zaštitu kulturno-historijskog i prirodnog naslijeđa, komunalna i javna komunalna preduzeća, potencijalni investitori, vlasnici i korisnici zemljišta i drugi zainteresovani subjekti koji iskazuju svoj interes.

Član 10.

Sastavni dio ove odluke je grafički prilog R 1:1000.

Član 11.

Ova odluka stupa na snagu danom objavljivanja u "Službenim novinama Kantona Sarajevo".

Broj 02-49-203/01  
18. oktobra 2001. godine  
Sarajevo

Predsjedavajući Općinskog  
vijeća Stari grad Sarajevo  
mr. **Ismet Ovcina**, s. r.

Na osnovu člana 25. Statuta Općine Stari grad Sarajevo ("Službene novine Kantona Sarajevo", br. 10/98 i 17/99) i člana 16. Poslovnika Općinskog vijeća Stari grad Sarajevo ("Službene novine Kantona Sarajevo", br. 18/98, 14a i 11/2001), Općinsko vijeće Stari grad Sarajevo, na sjednici održanoj 18. oktobra 2001. godine, donijelo je

**RJEŠENJE**

**O IZBORU ČLANA KOMISIJE ZA PROPISE I STATUT**

1. U Komisiju za propise i Statut imenuje se LIDIJA HODŽIĆ - za člana.

2. Ovo rješenje objaviti u "Službenim novinama Kantona Sarajevo".

Broj 02-49-208/01  
18. oktobra 2001. godine  
Sarajevo

Predsjedavajući Općinskog  
vijeća Stari grad Sarajevo  
mr. **Ismet Ovcina**, s. r.

Na osnovu člana 25. Statuta Općine Stari grad Sarajevo ("Službene novine Kantona Sarajevo", br. 10/98 i 17/99) i člana 16. Poslovnika Općinskog vijeća Stari grad Sarajevo ("Službene novine Kantona Sarajevo", br. 18/98, 14a i 11/2001), Općinsko vijeće Stari grad Sarajevo, na sjednici održanoj 18. oktobra 2001. godine, donijelo je

**RJEŠENJE**

**O RAZRJEŠENJU I IZBORU ČLANOVA KOMISIJE ZA  
STANOVE KOJIMA RASPOLAŽE OPĆINA STARI  
GRAD SARAJEVO**

1. U Komisiji za stanove kojima raspolaže Općina Stari grad Sarajevo

**Razrješava se:**  
NERMIN PEĆANAC - dužnosti člana,

**a imenuje se**  
HARIS LULIĆ - za člana.

2. Ovo rješenje objaviti u "Službenim novinama Kantona Sarajevo".

Broj 02-49-207/01  
18. oktobra 2001. godine  
Sarajevo

Predsjedavajući Općinskog  
vijeća Stari grad Sarajevo  
mr. **Ismet Ovcina**, s. r.